

Огоҳ бўлинг, барча ишлар Аллоҳгагина
қайтиб борур | Қуръони Карим дарслари
(150-дарс)

Қуръони Карим
ДАРСЛАРИ **150-дарс**

Қуръони Карим дарслари Шайх Муҳаммад Содиқ
Муҳаммад Юсуф роҳимаҳуллоҳнинг «Қуръон
илмлари» китоби асосида бериб борилади.
Мавзуларнинг тўлиқ матни билан танишиш учун
китобнинг ўзига мурожаат этиш тавсия этилади.



19:00 / 29.04.2025 2188

??????? ??????????:

الْكِتَابُ مَا تَدْرِي كُنْتَ مَا أَمَرْنَا مِنْ رُوحًا إِلَيْكَ أَوْحَيْنَا وَكَذَلِكَ

عِبَادِنَا مِنْ نَشَاءٍ مَنْ بِهِ نَهْدِي نُورًا جَعَلْنَاهُ وَلَكِنَّ الْإِيمَانَ وَلَا

فِي مَالِهِ، الَّذِي اللَّهُ صِرَاطٍ مُسْتَقِيمٍ صِرَاطٍ إِلَىٰ لَهْدَىٰ وَإِنَّكَ

الْأُمُورَ تَصِيرُ اللَّهُ إِلَىٰ الْأَرْضِ فِي وَمَا السَّمَوَاتِ

Аллоҳ таоло:

«Ана шундай, сенга Ўз амримиздан бир руҳни ваҳий қилдик. Сен китоб нима, иймон нима, идрок қилмас эдинг. Лекин, уни бир нур қилдикки, у билан бандаларимиздан хоҳлаганимизни ҳидоят қилурмиз. Албатта, сен тўғри йўлга ҳидоят қилурсан.

Осмонлардаги нарсалар ва ердаги нарсалар Уники бўлган Аллоҳнинг йўлига (ҳидоят қилурсан). Огоҳ бўлингким, барча ишлар Аллоҳгагина қайтиб борур», деган («Шууро» сураси, 52-53-оятлар).

Яъни, «Аввалги пайғамбарларга ваҳий қилганимиздек, Биз сенга ўз ихтиёримиз ва амримиз ила инсониятга маънавий руҳ – жон қилиб, Қуръонни туширдик».

Аллоҳ таоло бу ояти каримада Қуръони Каримни, Муҳаммад соллаллоҳу алайҳи васалламга ваҳий орқали юборган сўнгги Китобини руҳ, яъни жон деб атамоқда.

«Ана шундай, сенга Ўз амримиздан бир руҳни ваҳий қилдик».

Дарҳақиқат, Қуръони Карим инсоният учун энг мақбул, энг зарур маънавий руҳдир.

Фақат Қуръони Карим инсоният учун маънавий мақбул руҳ бўла олади.

Фақат у билангина инсоният маънавий жиҳатдан тирик бўла олади.

Қуръон Аллоҳнинг каломидир. Уни Аллоҳ таолонинг Ўзи Муҳаммад соллаллоҳу алайҳи васалламга ваҳий орқали нозил қилган.

Кофир ва мушриклар даъво қилаётгандек, Муҳаммад соллаллоҳу алайҳи васаллам Қуръонни ўзлари тўқиб олган эмаслар.

Чунки ваҳий келмасдан олдин:

«Сен китоб нима, иймон нима, идрок қилмас эдинг».

«Ўқишни, ёзишни ўрганмаган уммий эдинг, дин нима, диёнат нима, ваҳий нима, илоҳий Китоб нима, билмас ҳам эдинг. Агар буларни билганингда, «Ўқиб-ўрганганларидан таъсирланиб, ўзига дин тўқиб олди, Китоб нозил бўлди, деб даъво қилмоқда», десалар бўлар эди».

«Лекин, уни бир нур қилдикки, у билан бандаларимиздан хоҳлаганимизни ҳидоят қилурмиз».

Ўша Китобни – Қуръонни сен тўқиганинг йўқ. Уни Биз ўзимиз бир нур қилиб қўйдик. Ўша нур ила бандаларимиздан кимни хоҳласак, жоҳилият зулматларидан Ислом-иймон ёруғлигига чиқарамиз. Ушбу Китобга амал қила бориб,

«Албатта, сен тўғри йўлга ҳидоят қилурсан.

Осмонлардаги нарсалар ва ердаги нарсалар Уники бўлган Аллоҳнинг йўлига (ҳидоят қилурсан)».

Яъни, «Эй Муҳаммад, сен одамларни ҳидоят қиладиган тўғри йўл – осмонлару ердаги барча нарсаларнинг молики бўлмиш Аллоҳ таолонинг йўлидир. Сен Аллоҳнинг Китоби ваҳийлари ила Аллоҳнинг бандаларини Аллоҳнинг тўғри йўлига ҳидоят қилурсан». Эй одамлар!

«Огоҳ бўлингким, барча ишлар Аллоҳагина қайтиб борур».

Аллоҳ таоло яна:

«Ушбу китобда ҳеч шубҳа йўқ, у тақводорларга ҳидоятдир», деган (*«Бақара» сураси, 2-оят*).

Яъни Қуръони Карим шундай Китобки, унинг ҳақлигига ҳеч шак-шубҳа йўқ. Унда ҳамма нарса очиқ-ойдин, аниқ-равшандир.

Қуръони Каримнинг яна бир сифати у «тақводорларга ҳидоятдир».

Ҳидоят лутф билан мақсадга эриштирувчи йўлни кўрсатишдир.

Тақводорлар эса уқубатга элтувчи нарсалардан сақланадиган кишилардир.

Демак, Қуръони Карим ҳидоятдан баҳраманд бўлиш учун тақводор бўлиш керак экан. Тақвосиз қалбга Қуръони Карим ҳидоят солмайди. Кимки Қуръони Каримдан ҳидоят олибдими, демак, унда тақво бор экан.

Аллоҳ таоло яна:

«Батаҳқиқ, сенга очиқ-ойдин оятларни нозил қилдик, уларга фақат фосиқларгина куфр келтирур», деган (*«Бақара» сураси, 99-оят*).

Қуръони Карим оятларини Аллоҳ таоло очиқ-ойдин, равшан қилиб туширган, уларни инсоф билан ўрганган ҳар бир инсон албатта иймон келтиради. Фақат фосиқ ва табиати бузуқларгина куфр келтиришади.

«Ҳадис ва ҳаёт» китобининг 30-жузи

«Қуръон фазилатлари» китоби асосида тайёрланди.